

穆

堂

初

稿

先考新安府君墓誌銘

府君諱

字日生江南歙人也王父諱煥字漢章晚

乃舉府君甫就傳而王父見背弱冠遍歷江淮楚越卜
江西之臨川家焉娶母氏吳爲榮溪文英公長女初文
英公無子欲館甥資老府君曰是吾志也吾將有所寄
焉家榮溪二十有四年文英公旣終稍徙而北七里曰
下麓又十有五年康熙丙戌三月二十日辰時以疾終
于正寢府君生于明崇禎戊寅五月二十五日戌時得
壽六十有九生子七人長纘次紱邑學生三早殤四紳
五所馮六紘七繪子婦今四人纘娶吳氏文英公族孫

大紋娶徐氏卽下麓人紳娶蓮源黃氏紘娶諸生劉諱
彩女繪未娶孫男六人長源聘金谿諸生馮謙女紘出
次江次淇纘出次泳紘出次津纘出次淇紘出俱幼未
聘女三人嗚呼此足以誌府君也哉誌者志也此足見
府君之志也哉府君生而奇偉豁達任氣尙義不侵爲
然諾丁世亂離廢書卷顧喜觀古人已事審天下大勢
論成敗盛衰規遠畧不務近功嘗語纘輩曰陽生於子
而極於午故天下世運始盛於北而終趨於南自晉之
東王謝大族皆徙居南土宋以來江右尤稱盛氣益南
矣吾所以眷眷於此土也然紘自乙亥歲補諸生丁丑

始餽四試於鄉不獲舉地氣亦有不可憑者耶抑將蘊
隆焉有所待也嗚呼府君之沒也甲戌進士文林郎知
廬陵縣劉君廷瑛爲題銘旌其葬也辛未武進士武德
將軍府城守仇君元正爲題神主惟誌則未敢以請於
人輒爲私誌之如此併涕泣系之以銘銘曰

我李萬葉被於中州維府君生實抱遠猷涉江東西聿
來相攸披斬蒙犯以啟孫謀將老而傳未集其休金坊
之陽靈璫之幽人咸曰吉勿懷故陋善必有後歲事惟
修子子孫孫永千萬秋

資政大夫總督淮揚等處地方提督漕運海防軍務兼
理糧餉兵部右侍郎兼都察院右副都御史加四級
諡溫勤卽公墓誌銘

康熙五十有四年春正月朔戊戌昧爽總督漕運兵部
右侍郎兼都察院右副都御史卽公以望

闕行賀正禮蒙犯風露得疾越二十有二日己未卒於位
總督河道趙公用二日達京例疏聞

上歎悼數四下禮部議卹公故奉天廣寧人先世有列於
朝遂家京師秋七月其孤文燾文勳以公喪至京凶轉法
不得入都城親重大臣得請乃入公特奉

命抵居第治喪遣禮部侍郎

諭祭如典禮

賜諡曰溫勤諸孤將以冬十二月某日葬公於密雲某山故塋屬臨川李紱爲誌且銘謹按狀志曰郎氏先世以前明驃騎將軍諱王者爲始祖數傳並襲武爵入

國朝以從龍列勳舊族始大刑部侍郎諱位者公大父贈通奉大夫諱一鶚者公本生大父實生公考巡撫山東右副都御史諱永清以後侍郎自考以上三世皆以公貴贈如公官妣皆贈一品夫人公諱廷極字紫衡兄弟九人公與故湖南按察使廷棟及成都通判廷槐皆出

母龐太夫人生而穎異和粹六歲讀書知求解大義爲
兒嬉戲有犯者不校長老奇之稍長爲文典美會三藩
之亂軍興停止八旗制科乃以門廕授江寧府同知年
纔十九時于清端公成龍總督兩江方嚴慎許可獨愛
公每有讞決設旁坐試令聽斷輒平允盡情法于公歎
曰少年能爾他日此座屬君矣若數歲以卓異薦陞雲
南順寧府知府府在滇西徵元泰定時始設民故蠻獠
少約束輒譁公破崖岸宣示

朝廷德意方春數騎馬賁牛酒出郊外勸耕稼與父老相
語皆民大悅服土苗伏陵莽者剽掠無時至是亦息期

年循卓聲大起巡撫王公薦治行第一特陞河東鹽運使將之官聞巡撫公卒奔赴一慟嘔血數升日毀瘠血時時間作遂爲貞疾族黨稱孝子服闋補長蘆舊時票商處積習以重賕奪他人所有曰批地方保已所有曰不批地方課坐是絀公首禁絕鹽值平課亦以裕旋以內憂去服除補浙江益舉鹺政竟長蘆所未及行者時有

詔天下督撫舉賢官浙撫以公應

詔卽授叅政道分守登萊屬邑歲禮親行給賑民賴以活是歲高麗亦飢

詔發米四十萬石由登萊入海公汎舟送迎役不煩而事集
三年遷福建按察使獄多平反晉浙江布政使今戶部
尙書武進趙公方撫軍於浙繼之者爲陽城張公皆海
內清望公濟以和平江塘圯力任修築勸義助濟以罰
鍰成三卽廟險工建潮神祠於上訪宋六陵封植之修
董孝子墓議修寧台溫三府戰船以飭海防請減嚴州
所屯糧科則以甦軍困至今賴之

皇上以東南水利再

幸浙萬舫鱗次供億整暇

上嘉公幹濟

眷日隆賜予稠疊江西巡撫闕人

特命公馳驛往權院務逾月真領節公念封疆大吏當去繁
苛持大體勝息事寧人四字於堂恤吏愛民敬禮士大
夫文恬武熙境以大和在治連八歲皆稔江右地多山
漕糧州縣危溪險濇陡怒澀阻運艘不可達恒以小艇
木筏盤兌里民津貼夫船費石耗米五斗三升載賦役
全費歲分給如法康熙三十八年部臣忽議駁減總督
范公具情形入告奉

俞旨江右所屬州縣多處山陬百姓自顧貼費將漕米運至
水次者聽從前已經支給者免追著爲令至是部臣復

議停給併追已給者公毅然曰耗米非正課不當追且無耗米是絕漕運也停給而追已給已給者數無萬將安追耶漕丁有鳥獸散耳卽繕劄子以請得

旨具疏入部臣終以私見持不下公曰漕運京師之大命敢畏罪敗公事耶將終請之給如故終任凡三劄奏再具疏漕運藉以濟公以局度勝從容濡忍與人未嘗迂遇大事又百折不可奪如此尊奉

命兼理兩江總督益持風節裁一切陋規正已率屬無敢以絲粟餽者九閱月晉總督漕運漕丁黠鰲竄則作奸侵漁米石不可紀急則叫呼爲不靖持主者短長公撫以

恩繩以法皆聽令過淮抵通萬艘無後期亦無虧耗者
浙江嘉胡白糧經費久裁減公閱其苦請如舊給發他
惠政稱是公通籍三十年所至不爲赫赫名去後常見
思人以比何武生平不宿怨小人有乘急擠公者後爲
屬吏不自安召而慰撫之公退焚香讀書賦小詩自娛
尤工集句有北軒集藏於家遇晚進有學行者扶獎如
不及天性然也山陽令韓煒不悅於監司以病乞免公
慰留三載比公卒煒入哭慟絕喪一日曰善人亡吾安
所恃耶三日卽投劾去公恩德在人朝士知與不知聞
公逝咸嘆息或至出涕俸入盡于三黨撫弟姪恩意殷

篤有古人所難者歸裝不能名一錢總督兩江赫公等
賻助乃克舉其喪公生康熙二年癸卯歲四月初十日
距卒得壽五十有三夫人孫氏陝西提督振武將軍諱
思克女有賢行先公卒男五人長文傑尙鎮國公蘇爾
法女授四品額附亦先卒次文燾銀庫筆帖式文勲以
博士弟子員廕入監

天子念公勞召試西苑授文燾拖沙喇哈番補鑾輿司治儀
正文勲以應得七品官卽用蓋異數云次文烈文煦俱
候選部主事女四人長適舉人覺羅恩壽餘未字孫男
七人振塏振埰振城振埏振培振均振塤孫女三人俱

幼銘曰

國家重熙太和四塞惟良惟顯元氣是宅公起勳舊耀穎
綺年鴻軒鳳舉契於清端所至有聲蕃宣屏翰作南國
紀滔滔江漢長世字眊道德是藩和風甘雨景星卿雲
高而不危履信思順博陸小心萬石周慎公望之歸隆
彼三能謂松後凋而乃前衰鐘鼎旂常鴻伐斯在誰者
盪傷思遄懷懃千秋萬歲樂哉斯丘以保後生無疆之
休

經筵講官禮部左侍郎漳浦蔡公墓誌銘

雍正十一年正月九日禮部侍郎漳浦蔡公卒於

京師邸第

天子軫悼賜白金五百兩治喪恤贈如典禮給與全葬

皇子親王郡王咸致賻贈公卿相與弔哭賢士大夫塗巷
巷歎咸謂公繫天下之重不宜遽至於斯也逾二月諸
孤長漢等將以公之喪南歸以所爲行狀屬公弟子雷
鉉請余文銘神道之碑余放廢無似不足以光阡隴顧
自念交公久知公獨深則請爲誌且銘以納諸幽宮公
諱世遠字聞之福建漳浦縣人家梁山之麓曰梁村學

者稱爲梁村先生自其始祖諱元鼎以理學著子孫守其教成進士者三人並有學行公會祖舉人贈文林郎諱一橙祖庠生諱而煜考以拔貢生在羅源教諭諱璧並以公貴贈通奉大夫內閣學士兼禮部侍郎妣皆贈夫人公生而英偉不凡早承家學年十二三卽卓然自命爲古人敦踐履分別義利博覽經史爲有用之學十入歲補弟子員先後學使者以國士待之或引以自助巡歷校課出所刻捫齋初集古文示士子咸感歎以擬賈長沙乙酉歲舉於鄉明年儀封張清恪公來撫福建修復鼇峯共學二晉院聘公考教諭公爲師又廣延文

學士校刊儒先書公以英年主其局綴文序述多屬筆
焉己丑禮部試受知大學士安溪李文貞公尙書韓城
張公中式第八名同考官編修劉君巖得公文疑爲宿
學不知年甫二十有八也旣

廷對賜進士出身改授翰林院庶吉士是時李文貞公以
程朱之學教後進公故熟宋儒書旣見文貞公志益定
卓然以聖賢爲必可學庚寅歲急請歸省覲文貞公出
游楊立雪圖贈行謂吾道南也旣抵家侍親色養誠摯
辛卯秋丁外艱癸巳服闋赴都值

朝廷以翰林科道官乞假者多並

詔冠帶閒住或謂公以憂服淹留宜得白白則謝曰吾實以
假歸焉可誣也文貞公奏請公分修性理精義始暫留
一歲書成徑歸巡撫海康陳清端公走幣敦請仍主鼇
峯書院手定學約躬行率先儒風大振父子相繼爲全
閩士子師前此未有也丁酉內艱家居辛丑夏臺灣奸
民煽亂漳泉震動公集鄉勇團練保伍齊肅閩井恃以
無恐事平始解散壬寅巡撫呂公猶龍至仍延主書院
明年雍正改元新政旁求俊乂

特召公還朝授編修

命入內廷侍

皇子講讀是冬遷侍講權

日講起居注官二年實授分校鄉會兩試得人甚盛四年五月遷右春坊右庶子十一月遷侍講學士五年遷詹事府少詹事旋晉內閣學士兼禮部侍郎充

經筵講官

特恩追贈三代遷禮部右侍郎未幾轉左公自蒙

恩起用數歲間洊躋卿貳委任備至

經筵進講藉田從耕文武

殿試讀卷校閱中外文藝咸在其列侍值

內廷十年卯入而酉出未嘗一日輟

皇子親王並加敬禮郡王就學者自署受業可謂遭逢

聖明極儒者之榮矣傾朝注望臺省設施封疆厥用勸相
我

國家天不慙遺遠捐賓客豈不惜哉公生平孝友忠信胸
臆光明若青天白日爲善如不及敬愛賢者眎貴勢蔑
如也嘗語學者當爲第一等人俗儒溺時文希富貴不
自計樹立若何此鄙陋之至無足與論卽讀書止供作
文講學不務躬行皆可耻也嘗修復古禮行於其鄉農
人販夫皆知向化環所居數十里無博塞者二十餘年
矣邑令延至學宮講學聽者恒千百人閭士經明行修

者彊半出其門嗚呼盛矣今

聖主益崇儒術令天下立書院厚廩旣以訓士子誠得如公者數輩主持於上順風而呼其爲功海宇又當何如若之何而遽逝也公生於康熙壬戌三月十一日得年僅五十有二著述雖富未竟所志其已成書者二希堂古文十一卷詩四卷家規學約及家禮節要各一卷編輯歷代名臣言行錄評選古文雅正六朝四唐詩各若干卷又嘗與大學士高安朱公同編歷代名臣名儒循吏諸傳皆有益於後學娶劉氏

誥封夫人有淑行先公卒子男六人長卽長漢己酉舉人次

長湮郡學生觀瀾長湮並國學生長浩幼長注慧而殤
女三人孫男女各二人公之疾也長湮奉母夫人之喪
以歸長湮不脫冠帶而養者五十日湮之婦吳氏刲股
肉以進以求愈公疾蓋公之教行於家者如此銘曰

以道得民周官儒日月繼照尼與輿秦漢馬忽以蕪
區區章句聊紛挐維閩古稱東南騶游楊羅李下逮朱
蔡氏家學相鋪舒西山九峯如衡廬別子散出漳浦隅
維公奮起尤魁殊爲王者師一卷書下貳代履上貳舉
國家根柢古所儲陳經引義十餘載山川出雲大澤需
胡不百年神遽徂朝欻野歎同鬱紆我銘幽石深鐫鏤

千秋耿耿貞弗渝

廣西按察使司按察使白君墓誌銘

康熙丁酉歲余奉

命典雲南鄉試既出聞頗咨訪地方官吏賢否在城文武官數十員而雲南人士同舌稱賢不受屬吏陋規者惟雲南府知府白君一人又八年余出撫廣西而白君先已爲其地按察使同事逾年用是益知君清重有德君子人也君尋被內

召還京師明年余遷直隸總督又明年內轉工部方思與君晤言而君已退居於通州矣又四年爲雍正辛亥君年始六十有三遽以疾卒時五月二十有三日也君同懷

兄弟大學士近薇公潢來請誌君墓嗚呼余旣知君其忍以不文辭哉君諱洵字直侯別字又蘇世居奉天之蓋平縣曾祖諱文達遷遼陽始隸鑲白旂祖諱承舉從龍入關始居京師考諱允明仕至榮祿大夫都督僉事駐防廣東叅領自考以上三世並以君兄貴

誥贈光祿大夫文華殿大學士兼兵部尙書君生而孝友忠信讀書通大義年二十五歲任兵部筆帖式補廣西富川縣知縣富川多獠獍抗賦又時出剽斂前官莫敢如何君至卽嚴爲勸諭曰不率且發兵捕治會蒼梧道及平樂副將以佗事督兵道富川君具供張邀諸境上請

暫駐三日爲聲援自率健役十數人往捕梗法者曰大
兵至矣能聽我悉出首禍人穴可無洗諸猺獠咸恐如
令因而撫之期年頑俗盡革督撫奇其才保調南寧府
宣化劇邑當交廣之衝左江鎮道所駐劄水陸輻輳頗
饒盛吏因以侵漁民困至不可支則譁而亂君調得其
情悉去侵民法其尤甚者糧銀正額外兩加派數錢名
曰附封首請勒石永禁民驚喜以服政化大行秩滿遷
福建漳州府同知未上以外艱歸服闋補廣西梧州府
同知巡撫彭公鵬薦調思明府時土司有爲亂者殺叅
將勢張甚總督飭總兵官往勦以君爲監紀總兵官異

恆莫能制勝君以計擒其魁兩月而事平擢陞雲南府知府首以廉率屬省會舊有十八行牙戶以通商賈奸僧數人欲奪其利賄昆明令請於巡撫總領諸行君獨持不可得止商人立石紀德焉督撫會疏薦陞按察司副使分巡永昌道五十九年西藏用兵督辦軍需糗糒芻茭轉運絕徼數千里昕夕籌畫經年始還鬚髮白過半雍正元年

特旨遷廣西按察使明年余至獨倚任君未幾布政使闕員委君併權其事廣西地方二千六百里藩臬兩司事無不統治法刑章益整以暇蓋君四任廣西民之情僞事

之利弊興釐無不洞悉余嘗有所問無不知者知必言
言必盡君所以裨余者多矣君齒未甚衰猶可以有爲
而止於斯余所爲歔歔而太息也君娶錢氏火器營操
練尉諱文龍女累封至淑人生子暎梧候選府同知女
四人候選州同李英贛州府知府施士崗襲世職一等
阿思哈尼哈番加一級拖沙喇哈番兼叅領祖應樞臨
桂縣丞張本闔其婿也側室王氏生子暎松一品廕生
女一人許字宗人府八品筆帖式兼副領佐張玉孫男
女各二人是歲八月十有二日君葬期也玉田縣亮水

橋祖塋君葬地也銘曰

西南之荒實惟粵與滇古所羈縻今大化以臻何以牧
之維吏之循君以廉明旣武且文威信大行周歷連綿
任滇二粵四凡三十餘年點蒼之山湘灘之川桐鄉愛
君永矢弗諼此藏者委蛻弗禦其神炎雲萬里永瞻斯

原

湖南按察使郎公暨元配金夫人合葬墓誌銘

郎公樸齋先生及其元配金夫人將以今歲秋八月望後一日合葬於某山之丘其孤某等先期述其行踵門來告屬爲文合誌之余喟然曰郎公子之於禮也其是也夫余攷唐宋以來誌墓之文少合撰者則附而離也久矣孔子曰衛人之附也離之魯人之附也合之善夫蓋穀同室沒同穴於禮爲允於孝子之情爲盡宜夫子之善魯也謹按狀公諱廷棟樸齋其字世爲廣寧名家考諱永清歷官巡撫山東副都御史生公兄弟九人公行第五與第四兄今巡撫江西諱廷極第八弟今通判

成都廷槐皆出龐太夫人公自幼岐嶷年十八娶金夫人夫人亦鐵嶺名族考諱維垣正黃旂副都統夫人生有異徵賢淑明敏既歸公操家政不遺餘力公得一意官事無內顧虞公初以太學生謁選授福建漳州府長泰縣知縣縣經耿藩之亂流亡者衆公撫輯有方舊例戶出公費銀貧民病焉公令計田徵費咸悅服勒石著爲成法歲餘以內艱去民巷市詣部使者乞留公諭遣之弗聽別駕郡司馬來勸譬仍弗聽監司親臨反覆開諭始流涕解散其壺漿送公行百里不絕公居喪盡禮與兄弟皆毀瘠有三孝子之稱旣免喪領運湖灘河米

敘績以府同知用康熙三十五年

天子親征噶爾旦公躍然曰此臣子荷戈效命之秋也具劄子啟奏願以家財備車馬從征出口坐臺凡十有四月以績敘陞四川保寧府知府奉

特旨再以應陞之缺先用明年遂授直隸霸昌道按察司副使治昌平州最衝要管京城四路捕盜同知及居庸關古北口諸塞公捕治明迅盜賊屏息今大學士安溪李公時巡撫直隸再奉

命修築永定河張客莊石堤俱委公料理公厚餽募工應期事集

上親臨薊州閱視至信安當拔支河壩椿以便舟行咸以壩解則水急洩上流之舟必淤阻大臣將馳奏而

御舟已發相顧莫敢任公毅然曰倘詰責卽云卽某遲悞可也旣

御舟至投碇俟拔椿乃行亦竟不加譴其勇決類此塞外每年例貢皮張自張家口抵京千里車贏勞費不貲公特請由驛站遞送至今便之歲給各鎮協兵餉悉如法又雅意文治葺文廟興義學己卯京闈榜放臺臣言南人冒北籍應式內有中式舉人唐執玉王昌等八名牒公察治公以士子獲舉甚難且率土王臣何斤斤於此

訪有入籍田土戶口墳墓卽不問再奉駁審南北語音
時嚴寒諸生窮乏趨昌平良苦公乘公事赴京師集詢
審非南音卽列狀保之巡撫李公以公清慎勤勞獎勵
再四又數薦於

上蒙

賜御書一幅四十二年

覃恩許援京官例以加級授資政大夫金夫人封二品四十
三年秋湖南按察使缺人遂

特旨授公時巡撫湖南者爲今左都御史趙公申喬趙公故
以清直名天下獨契賞公事無鉅細輒委任之有不合

商酌往復如家事公亦感奮在任七年清謹一節長沙
舊獄男女雜繫公惻然特設女監募禁卒妻守牀歲給
工食獄多疫又慎選醫士一人給厚餼日周視司府縣
四監月按監犯名口給以薪米衣絮曰此中保無有枉
繫者耶其忍之也湖南邊苗州縣距省會遼遠者一切
重案公請爲展限兩月命案有從前不知後察出自行
通報者請免其叅處又以命案兇犯在逃者承緝接緝
踵叅無已請於承緝限滿一叅後卽准照案緝拿免其
再叅其接緝之員止令嚴緝免其限年叅處旣俯寬屬
吏亦以綏靖邊苗督撫稱善並采擇入告趙公連疏薦

之未及用而趙公內陞公故不治家人生產內政一以
委金夫人嫁二女娶兩子婦食指浩繁米鹽凌雜夫人
拮据佐公積勞致疾以康熙四十九年十月十六日卒
於官舍年四十有四比次月十六日公亦卒聞者駭歎
士民咸墮淚曰仁人曰廉吏云距公生之歲得年四十
有六子男五人長卽某次某某皆歲貢生候選通判女
四人一適候選知縣某一適副榜貢生某某其二未嫁孫
女一人嗚呼公抱負遠大而年不足竟其業可哀也已
顧吾聞之古之君子不懼年之不永而以修名不立爲
憂今天下理學名臣推安溪李公第一而都御史趙公

尤號爲清剛多忤少可公獨受知於兩君子則其蘊而未發者可以知己況所施已若此哉爲之銘曰

赫然名世而實於中路天立厥配而受命弗固譬景星與卿雲莫恒據爲旦暮未白首而同歸乃一瞬而不寤豈施於子孫以篤家之祜庶千歲而萬歲兮識公此墓夫人此祔

故江南按察使王公墓誌銘

誥授通議大夫江南按察使司按察使睢州王公考終於家
將以某日月營葬公子狀公行治來京師將乞銘於左
都御史朱公適朱公居憂乃以命臨川李紱紱爲公季
子澄慧典試所取士通門之誼知公爲深不敢以謏劣
辭謹鉤篋其條件如左公少警敏年十六補弟子員康
熙丙寅起家東明知縣不及一歲以內艱歸庚午補任
獲鹿乙亥入爲戶部陝西清吏司員外郎丁丑陞福建
清吏司郎中己卯

特擢江南糧儲道辛巳十月復

特陞江蘇按察使司按察使敍歷中外垂二十年年甫逾五十卽以疾告歸優游家食又十有八年遇事有能名所至有恩上結

主知下孚於民外自公卿大夫內自比閭宗族同舌稱賢其爲按察使也宿州某生携妻子授徒某氏家其妻臨產妻兄之女來謁數日妻子均中毒死館人曰若與妻兄有隙乎曰有之曰是矣必令其女置毒也生控於州女交臂歷指不勝楚遂誣服獄具未上公至疑之問館中來往者何人女曰止一十二歲某徒耳召而曲誘之曰師扶我急因置礮麴中生之妻兄乃得釋無錫民某與

攻皮之匠毆已而匠死有僧故與某仇証爲傷重致然
令如僧所誣論擬公察鬪毆日月在保辜限外因詰曰
傷久何得不醫具言醫矣檢所用方則匠死傷寒耳僧
乃伏罪平反多類此其爲糧儲道也所屬舊有倉規銀
鉅萬並虐取之民監司利其入百姓疾苦弗問歲遣一
役飛一檄塞巡漕故事而已公至皆杜絕轉漕時扁舟
巡察懲其濫收者宜興僻處萬山中一夕忽至百姓訝
曰吾民不見糧道四十年矣今乃飛至耶因號曰飛糧
道道庫歲收銀八十五萬兩爲修船及弁丁運費前運
丁預支行糧例扣月利丁益困公悉除之照額全給丁

立碑頌德仲雍墓在虞山久廢不修城隍廟瀆祀者眾
演劇享神歲糜金數萬公曰教化監司責也葺仲雍墓
封閉城隍廟門在戶部時吏弊不得行尙書澤州陳公
倚任之薦公才能其治二邑績尤著獲鹿爲山陝衝衢
公治驛有法民不知有供億苦時有陝西寡婦兵還京
頗繹騷井陘令巽慙巡撫檄公併料理兵戢不譁歲歉
出穀以活餓人親給銀米編審戶口鱗次面訛里長不
得爲姦利上下東明縣錢糧多欺隱居民流亡公至易
甲長法大戶用其族長催之如是兼併不行流亡者來
歸酌給以牛種縣分四十里里養馬一匹以備官用侍

焚芻補倒斃民苦之勒石禁止賈五雲梁進者盜魁也
檄至今日吾知若名素矣五雲汝爲總練進汝爲保長
邑有盜汝緝不用命卽斃汝也盜遂絕跡有馮化者勾
逃人誣其鄰某某信於鄉保者數百人公密令匿他所
別令一人跪堂下召逃者謂曰汝識某可執以出逃實
不識也見一人跪堂下執之眾皆譁逃技窮乃曰馮化
給我眾中有欲遁者公曰必化也追之果然重責逐之
安某客於外繼妻高氏與前妻之女在室高通於劉某
忌女言其情圖并亂之女不從共戕女以死公曰高母
道已絕仍照故殺子女律擬其何以戒爲繼母而淫且

毒者遂比照故殺妻前夫之子律論斬巡撫避其議具
題

報可令著爲成例東明距睢州百八十里公之遭太夫人憂
也東明人赴睢弔奠白衣冠數千人門卒報知州乃聽
入城巷填塞觀者歎異陞按察使時十五衛四十九
官丁咸請留不遂去之日泣且拜以送與其鄉先正尙
書湯公斌撫蘇內召時畧同胥門外有坊曰民不能忘
爲湯公建也民鐫公姓氏於其次蓋公少學於湯公湯
公深契之其政事有本末非偶然也歸田後待鄉黨尤
篤睢州學宮舊無祭器公製銅器三百餘事諸生觀禮

焉初公需次家居集州士爲文課延處士田先生蘭芳
主之士風日盛至是乃益振又設祭田百五十畝以羨
餘助昏葬及衣食不給者大要公平生知大體識定力
決勇於義而枋於正出之以誠行之以恕惜乎用之不
竟也癸未

上南巡公力疾迎覲

上顧巡撫宋公云朕聞王某督糧儲時甚好隨遣太醫臨視
賜德里雅噶神藥一器次日

賜初寒詩一幅隨趨

行在謝

恩溫旨再下教以調攝甚備公諦聆感泣謂臣受

國恩今疾無以報塞

上因賜世恩堂額同僚咸謂公且大用不可量而公去益決
曰按察使任大責重臥治卽辜

恩矣竟歸不出公會祖考諱承泰顯上縣學訓導祖考諱烜
開封府學增廣生兩爲鄉飲正賓考諱震生順治壬辰
進士累官江西提學僉事並以公伯兄紳貴贈光祿大
夫妣一品夫人元配郭太君雲南督學諱昌女累贈淑
人生子二長沛聞嘉興府同知次澄思辛卯舉人側室
湯恭人生一子卽紱鄉試座主癸未進士刑部浙江清

吏司卽中孫男四人耒禾穎穢女九人公譚繻字慎夫
生順治十年六月十八日卒康熙五十九年五月初九
日再遇

覃恩誥授通議大夫銘曰

六德有邦三德有家日宣日嚴小大維宜維公翕受以
敷以施人無寡小地無廣遐庇人調俗綏良警頗

天子曰於艱食無嗟爾瘠民肥醫藥爾加

天子曰都茂績可磨勝堂世恩雲爛星葩睢流沄沄恒阜衙
衙水無涇源山無壑波山水匪貞公德靡涯

功加左都督封翰林院庶吉士姚公墓誌銘

嗚呼求士之本行於今世其猶有耶抑亡也才不足與
有爲退而修子弟之絕者有之矣抱負殊絕致崇階卒
棄去踰伏而不出以養其親吾未見其人也若文山姚
公其庶幾者耶公諱昌字鳳和文山其別字系出江南
徽州七世祖遷浙江餘姚曾祖諱某再遷杭州始爲仁
和人祖諱某負才早沒考諱某以孤子知名構翼鴻堂
藏書數千卷生子三公其季也生四歲亦孤母潘孺人
年甫三十矢志撫之稍長問母吾父安在母泣曰汝父
沒久矣卽慟絕旣就傳讀書必求其義訓每更端請益

塾師或窮不能荅十五歲試文補弟子員餘藝事性而
能之杭故叅議黃公汝亨號名家家孫諱燦者偕其弟
負門弟召諸少俊爲文譙公數百言立就酒半投壺樂
賓算多獨賢莫有釣者旋出射戟枝角飲輒連中黃駭
嘆贈古硯墨各一以子歸焉今勅封孺人者也歲辛酉
靖海侯施公琅奉

命取臺灣聞公才檄至幕府公念母不欲往潘孺人趣曰能
報

國取出身不必獨在文章也同學生並爲秀才從軍詩贈
行遂至閩與施侯論合叅與密謀癸亥六月出洋風猛

舟顛簸接戰小不利或獻策懸轆轤舟中士乘其上隨
波俯仰卽不苦瞑眩公力贊其法曰我士習水不若寇
非此無以制勝也再戰果捷斬首萬二千遂復澎湖賊
猶恃險曰鹿耳門者石沙隆起兩崖間舟莫敢飛越公
曰此地利耳可以氣勢奪若從萬巖乘勝趨鹿耳守者
意不及疑神兵自天而下必烏獸散洎而攬其舟可入
也施侯以爲善卽日乘風進發直抵鹿耳門萬眾譟呼
海水爲起立驟高數十丈戈船銜尾而前拔其水寨賊
奔潰窮蹙出降三十六島盡拔捷

聞諭功外委官首施侯子世驃及公並加十九等授左都督

仍各紀餘功二次初公在閩海音問阻絕或妄傳公戰沒潘孺人晝夜哭曰兒故不欲行殺兒者老寡婦也且哭且嘔若有蟲嚙腹痛輒絕月一作作三晝夜乃平公歸治之百方不愈藥金盡鬻所乘馬取藥潘孺人止之曰兒方以武功進馬不可棄也公泣曰兒以從軍致母得奇疾每聞呻吟聲心卽裂敢復仕乎武職多在邊海如險遠不得奉版輿往卽方寸亂安能復任事願終身守吾母不復出矣當是時施侯子與公敘階埒仕至福建水師提督其敘亞於公藉戰階取節鉞若叅遊以下猶數十人或勸公出終不應丙戌潘孺人沒毀甚持服

歷三十六月或疑過禮則泣然應曰三年之喪二十五
月而畢中月而禫禮誠不可過也顧吾母節未彰報德
無所遂吾哀焉固且無窮敢歎於三年之實乎兄早卒
撫其孤推遺產禦外侮甚有恩家居久涵養深粹老不
廢學工書精詩筆旣不仕以授諸子長世榮廩監生次
鴻雲山陰縣學生次憲發並國子監生歲庚子余典浙
江鄉試舉世榮明年典會試世榮復中式殿試

賜二甲第四人進士出身改授翰林院庶吉士又明年遇

新天子登極恩封公如世榮官踰旬訃至京蓋公於十一月
十七日卒於家年七十有二公素無疾以疽發左股數

日遂殆彌留戒鴻雯等我死魂魄戀吾母葬我母墓側
無它語云黃孺人溫且惠助公孝事姑先姑一歲沒姑
慟曰喪余婦余其能久明歲果病不起黃孺人耐姑墓
前若干尺墓在塘栖鎮超山之陽世榮歸將以某年月
日啟黃孺人隧合窆乞余爲誌且銘公女子三人長嫁
錢振次嫁候選縣丞顧彝次嫁國子監生金弘圖孫男
五人女九人銘曰

澎湖金厦橫南東鷄籠虎井海若雄投筆仗策收奇功
建牙開府哲爽邦胡棄不取桑梓恭曰有發母疇尸饗
九京相從猶孤童厥配儼德美必雙茲丘隄嶮孝作忠

有來封土維蘊崇我銘勿壞垂無窮

中憲大夫四品額駙郎君墓誌銘

君姓郎氏奉天廣寧人故總督漕運溫勤公諱廷極之
冢嗣也方溫勤公巡撫江西余謬以文受知戊子領鄉
薦公爲資遣且日余兒文杰在京師足相主也旣至君
以兄事余余旣成進士入史館資用悉仰君君敬愛有
加故知君深君嘗酒後中熱謂余曰吾家世勲舊未易
爲其後十四五時學制舉業欲以文自奮比來京被選
爲額駙不得應科目弓馬故所便乃習韜鈴思馳驅于
武顧海寓承平無足自效將安所置吾身耶當是時神
氣騰蹕若不可一切余勉以士患無可見不患無時因

和生初集 卷之二十一
自立課程晨起習

國書讀唐宋人詩餘後作字習騎射二年而余乞假歸
一歲復來聞君稍放於酒諷之則喟然曰吾年十八受
國家爵祿卽思效尺寸以額駙散館乞職守七年矣平居
宿直火禁詰奸宄清斥埃月更番八九若扈

蹕行幸馳千里數百里淹歷時月者無歲無之衝犯寒暑
陵山涉溪臥起驚驛嘯虎間不敢告勞然此豈足爲功
業哉限年而進此流俗之所勉也余則不能心頗然之
然君自是患氣逆作無時明年遂患腳氣又明年歲在
癸巳爲康熙五十有二年忽雨足浮腫漸上騰逆腹達

胸竟不可起以閏五月五日卒神氣如平常距生年凡二十有六歲君天性肫摯孝友厚故舊解推如不及委曲周謹至縱論天下事若數言可了不知於施行何如其意固已遠矣歲丁亥從

上清暑督席北生番出邊番頑獷難馭君部其黠者爲長終事以不譁辛卯運木於塔兒山山在熱河北絕峻阻暑雨丁役不用命君設勸程立水中親趣之先期而工竣壬辰俄羅斯來朝日久馬病

詔放青沿西發以君往監時夏初草淺居民創見遠人或震匿君部分帖帖不病民水草亦充比代者反所爲不十

日馬斃而民怨矣其秋演火礮於蘆溝橋事久不行故將宿卒頗皇惑君指揮若素習其小試若此其生平高論非盡狂而不信也母曰孫夫人妻投鄉君貝子蘇爾法女子四人振塏振琛振城振煥女一人俱幼振城以後其同母弟文勲君卒後二年溫勤公卒君弟文熾文勲等營葬余旣爲誌而銘之旋以某年某月葬君於密雲縣白崖山之東曰北山余不忍不誌也又爲銘曰

世不需材耶君胡以生天不愛材耶君胡以成旣生且成曷折之方英栢耶松耶君之庭耶神兮冥冥孰干爾

扁耶

左都督李公墓誌銘

康熙十有三年甲寅春耿藩亂夏五月犯江西有以千戶拒賊父子死封疆督臣以江西第一殉難功入告

特恩賜祭葬贈昭勇將軍子贈安遠將軍蔭守備二人者爲鳳山李公某公其家嗣也諱世芳字蔚文號如民世居江西南昌府奉新縣鄉曰同安里曰鸞岡爲邑著姓生而倜儻嗜書史工擊劍初鳳山公分汎建昌府之南豐公隨侍久歸應文童子試後期或勸就武公故嫻決拾通曉兵書遂以第一人補弟子員己酉鄉試舉武進士明年會試兵部下第歸復居南豐南豐接壤福建耿寇

猝至圍其城勢張甚檄城中降而鳳山公所部不滿百
人公率家僮數輩潰圍趨南昌乞援兵未及發而鳳山
公與季子諱名芳者俱戰死督臣董公卽以鳳山公職
委公隨師赴勦比至涕泣疾鬪敗賊眾圍遠解擒其魁
四人斬以祭父若弟督臣馳奏鳳山公父子殉難事併
上公功以蔭補公督標中營守備時三藩並反耿尙旋
破滅惟吳肇猶嘯聚滇黔有

旨命董公會勦董公奇公材以公隨征多見諮委遇敵輒先
登凡二年賊平大小數十戰功加至左都督又帶餘功
十七次

誥授榮祿大夫贈三世如公階丁巳歸以事平裁缺別補公
亦念戎馬苦願得休息顏所居曰放閑有終焉之志撫
臣安公鎮臣陳公稔知公材畧明年交章起公補撫州
營城守以陣亡卹賞事牽連報罷公怡然曰固吾志也
吾數年來出入鋒鏑間日几幾死今全而歸不猶愈乎
旣事白撫臣商丘宋公將爲公題請開復公辭甚力乃
已平生博雅能文章旣閒居益肆力爲之精書法好賓
客待人有恩部曲卒伍奉裁汰者卹其寒餓久益不衰
以某年月日卒得壽幾十有幾公早歷疆場息肩於中
路風甚高厥施未究君子惜之兄弟三人季卽贈安遠

將軍者仲弟與公並以難蔭起家任成都守備公孝友
肫篤謝事後馳蜀道視弟會仲弟以從征打箭爐功陞
東川副將東川僻阻苗獫狁雜難治公密佐之民賴以
安旣仲弟亦倦事轉官遂乞休道遠艱於歸撫臣爲請
家於蜀公娶王氏封夫人子二長疇國學生次訥甲午
科武舉管四川塘務候補守備以後其仲弟女一適諸
生陳某疇等將以某年月日葬公於成都某山公有從
子嵩余乙未典武會試所得士也訥在京師因嵩識余
故來請銘銘曰

士行所宗嚴孝與忠公併而植士藝所處矜文若武公

總而力進厲其鉞退善其藏舒卷孰迹吳蜀路岐氣無
不知載銘茲石

文林郎江西廣信府貴溪縣知縣加一級韓公墓誌銘
康熙戊子歲紱以諸生應江西鄉試韓公蔚原先生以
貴溪知縣充同考官分校五經得紱卷領解第一既榜
放謁公於邸舍溫如也辛丑以庶吉士乞假歸謁公於
貴溪縣治是秋公至省分校武鄉試復往謁每見益親
明年入直史館又二年甲午聞公以四月二十二日卒
於官南嚮哭之乙未公之喪北還其孤繼琦將以丙申
歲某月某日葬公於某山之兆先期屬紱爲誌不敢以
不文謝謹按狀公諱蕃蔚原其字少英特工綴文年十
五補弟子員二十八舉於京兆五上公車始成進士又

七年謁選得貴溪在任凡入載立義學訓士禁溺女建
育嬰堂收棄兒哺之縣城舊毀於水草竊時有嚴保甲
修東西城樓守望整愍民賴以安咸立石頌德嘗攝篆
弋陽罷一切供應曰吾官自有俸不當更累一邑天性
謹厚吏事和巽民安其慈惠貴溪當江廣閩浙之衝皇
華寶餞驛賦不支公不欲累民恒拮据以應又連歲捐
賑多費遂虧正賦盈千比卒無所償縣尉某者貪鄙人
也公慮其病民素不假以事權缺望久困詭言公所虧
在私橐是時貴溪士民以公喪會哭於邑凡數千人憤
尉言咸曰吾公清節寧有是共懷鐵挺尉尉以事他出

懼不敢歸民終不肯散因爲公治喪朝夕哭上食又設
義櫃助捐虧帑旬日而數充貴溪俗誠厚然非公恩德
在人亦安能致是公生於順治庚子歲五月十七日距
卒得壽五十有五先世由山西洪洞遷真定武強累傳
族益大鄉人名所居曰韓家村祖曰萬福考曰天樞祖
母范孺人先卒繼崔孺人年始十九生子二次卽公考
方娠而祖逝崔孺人矢志撫二子公考終諸生未能以
崔孺人苦節聞於朝方有待於公公自通籍中遇

覃恩贈考如公官妣孺人未及推恩二世在貴溪資望深以
前令事累不得遷轉日夜念祖母苦節思所以褒大之

卒之歲前令事已遷有日矣乃竟不及待豈命也耶豈命也耶元配王氏贈孺人候選州同諱師臣女有賢行能佐公治家先卒今附公葬繼配徐孺人又配王孺人又配劉孺人皆出世族子男五人長繼愈府學生先卒次卽繼琦歲貢生次繼嬰繼厥繼雍俱殤女五人長適王之珽次適諸生多元朗餘未字孫男二人璿瑗孫女一人曾孫一人銘曰

孰測方圓有矩有規孰念民情有詛有譌功不在大亦不在多載其慈惠何施不宜公之爲政旣柔且嘉維彼薌溪起瘁息罷公生民樂遨嬉以和公逝民哀聚歎以

嗟義聲所激虺蜴則那營丘反葬桐鄉如何的的者隔
裁裁者阿循吏之書後死匪它銘此奧隅永世可磨

故平安知縣管公墓誌銘

故平安知縣管公諱閣字弗若世爲臨川人曾大考諱
某大考諱某並不仕考諱某始爲府學弟子員後贈如
公官明兵部侍郎丘公兆麟爲諸生時以才下視一切
贈公往請業獨見賞異妻以長女實生公公生而穎秀
丘公絕愛之每摩其頂曰可兒年十三入縣學啟禎之
際臨川文學方盛丘公與陳公際泰等主天下文事學
者視其文爲轉移得一言爲重陳公嘗題公作云高可
繼歸太僕下不失爲吳司業由此遂知名曹公鳴遠負
時名來令臨川季試諸生拔徐公春溶李公來泰置超

等而以公冠之徐李爲學中殊絕士公一旦出其右名益起丙戌鄉試廬陵令常君庚得公卷以元薦主考不可辛卯始被舉計偕輒不第公與從弟編修公愷稱二管編修舉後於公已亥成進士入翰林與禮閣分校公猶在公車頗自閔淹卹癸丑被薦復見抑始就吏部選得直隸安平縣縣有二大患一鹽徒一渚沱河公爲額定官商嚴句稽私販不行教民增築隄防水不復衝決縣有崔鶯鶯廟歲會士女燕敖甚盛鑰其扉嚴禁之縣志久漫滅親加撰次學宮圯捐白金五百兩倡修綏催科勸勸課三年而政理巡撫都御史金公題其堂曰政

績和平公欣然曰吾亦小試吾道耳今政成可以已矣
吾少負文譽而不成進士天之於我甚嗇吾其敢奢取
於天耶遂乞歸進士崔君甲默偕縣人遮留公徑行崔
君蓋公試童子所首拔者也公故擅藻鑑庚戌寓京師
選房書學者咸誦法之客廬陵時代常令閱試士卷得
張公貞生爲第一張公後官學士以翰林直諫爲名臣
公性孝友持名節居母喪哀毀辛丑會試畢心通卽馳
歸贈公果捐館先世遺產甚厚以讓諸弟退居二十年
閉門讀書絕迹公府所著書曰天成子藏於家文集易
經文稿及藝文萃字學正訛左傳句解四書約講五經

要義等書並行於世丁丑冬卒年七十有七初娶丘氏
贈孺人生長子守亮繼娶鄒氏封孺人寶定推官諱士
楷女通書史明大體能佐公政治待丘孺人子尤有恩
後公十年卒年亦七十有七生二子守仁國學生守奇
府學生孫男十三人景岱景華應運並諸生公子若孫
將以某年月日葬公於某山之兆鄒孺人附焉余弟繪
長女守奇子婦也故來乞銘銘曰

文可以掇甲科天靳其一第治可以佐雍熙自盡於一
試文明以止在易爲賁茲丘之藏孰窺其際

翰林院侍讀學士沈公墓誌銘

代曹少宰

余同年友學士沈君東田先生將以今某月日卜葬於某山某丘其諸孤遣人持狀走三千里外抵京師屬誌其墓君以康熙壬午歲冬十二月終於籍里距其生年順治己丑夏五月得壽五十有四以己未成進士與余同入史館荏苒二十餘年歷官侍讀學士再以艱歸哀瘁踰年卒其生平皆余所及知其未交余以前與旣別余以去其家之所知而余或未悉者皆可以余所知者信之也情旣睨好知之又最深義無所讓遂敬爲誌且銘使歸納諸其幽宮君諱朝初字洪生東田其別號系

出姬姓沈子之後自其始祖某以下居蘇之崑山世有
隱德自孝廉某以下始以科名顯考諱世奕順治乙未
進士由翰林國史院庶吉士授編修充

日講官後以君貴贈朝議大夫司經局洗馬妣氏范翰林院
檢討必英姊累贈太恭人洗馬公生子五人君行三生
而穎悟好學問范檢討異之推劉盧之好更妻以女初
讀書舅氏萬卷樓窺其藏簡殆遍故禮部尙書韓公葵
文章爲海內宗主方伏處里閭君與兩兄延欸於家商
榷討論戊午魁其經己未成進士改授庶吉士先是君
仲兄旭初由丙辰進士官編修一時父子兄弟並在翰

林時人榮之辛酉授編修乙丑正月

御試詞臣

保和殿越日覆試

乾清宮才十一人而君與焉二月會試分校得士多孤寒
名雋七月以外艱歸服闋又二載入都壬申三月授右
春坊右贊善四月轉左甲戌夏遷司經局洗馬未幾侍
直

內廷

召見西暖閣試御前金蓮花詩稱

旨又

命書綾字一幅丁丑冬擢左庶子己卯夏遷翰林院侍講學

士庚辰夏六月十七日

召試暢春苑翌日

賜御書綾字詩一幅是歲冬轉侍讀學士君自授職後

御試凡六悉奉

溫旨嘗進呈紀恩詩有兩世三人蒙簡擢廿年六試荷優容
之句紀其實也三與武殿試執事甲戌丁丑再分教滿
洲庶吉士始充分纂會典官又分纂大清一統志明史
平定朔漠方畧唐類函續編凡歷五館每一彙成總裁
必咨賞君天性淳實深摯重大節修門內之行其以外

艱歸也依恃北堂有終焉之意既服闋二年太恭人督
促始赴京師蓋君考官編修卽陳情終養以三世錫命
責之諸郎故太恭人用此意相勉君乃不得不行既補
官卽爲迎養計太恭人故不欲北又慮其引退輒謬許
之侵尋日久知終無就養意壬午遣家南還將遂謀乞
假而太恭人遽逝君倉皇奔赴哀愴過深期年竟以孝
死疾且亟語諸子我兩親未葬不可以死而今至此命
也古人未葬不除服我斬然苦由中死必以衰經歛更
無他語初君兩兄早世撫其子如已出生平沖退無躁
進意長子曾純丁丑成進士不爲色喜曰汝之憂勤自

此始矣旣謁選得義烏則勉之曰我與父兄俱列清班
未親吏治寄百里之命當三世之恩未易言也次子太
學生曾佑邑庠生曾虹已卯鄉試並獲薦於同考主者
以他故相抑君夷然曰積學無不達而遲速有時當自
患無爲患人其所以訓子如是其自爲者可知故位止
於此平居遇故舊有恩自贍不足而汲汲好士詩古文
典贍有則所著不遮山閣棗極爲新城王尙書秀水朱
檢討推許噫君之於人可謂成矣而不能以無嫌者位
不足稱其德年不足達其才余所爲載筆而悵然也范
夫人誥封恭人子男三人女五人孫男七人女三人銘

曰

文王季子邑所食汝南沈亭古其國苗裔寔昌麗不億
必有達者繼明德中吳奮起文章伯綜史三長才學識
於月幾望日未稷胡不百年吾頗惑欲發不盡慶無極
積家之餘子燕翼茲丘之兆龜食墨佳城鬱鬱君焉宅
水有時凝石時泐千秋萬歲視茲刻

威畧將軍福建水師提督吳公墓誌銘

代安溪
座主

公諱英字爲高號媿能世居泉之黃陵後徙大浯塘曾
祖曰賓吾祖曰振泉父曰登並以公貴累贈榮祿大夫
妣皆贈一品夫人公早孤值海濱搶攘川將才起家隨
大師克平金厦功授都司僉書隸浙江提標歲甲寅三
藥並興耿精忠軍出仙霞駐金衢旁入江西海寇響應
東南震動或間公閩人不可信提督塞公獨深契之授
公左營遊擊公奮勵甫視事三日退寧海梅坑賊進兵
雙門解台州圍復破水賊張拱垣於三門港殲僞帥朱
飛熊于毛頭洋軍氣大振旣鑲藍旗貝子到浙視師提

督首薦公卽命爲前鋒公引兵揚言修毛坪路陰襲涼棚取之斬賊帥劉邦仁遂復黃巖貝子奇之尋令復太平樂清等縣抵上塘遇賊兵二萬衆奮擊之斬數千級賊帥許奇保殘卒據綠帳隔河而陣公下令入負草一束夜乘潮填河而濟大破之遂由猴孫嶺奪其堡引大兵直至青田僞將連登雲以十萬圍處踰二載聞青田破餉道阻絕遂夜遁有曾養性者耿之梟將也時擁大兵據溫乘我師初至分五路夜燒我營公急白貝子令諸軍棄營據險軍以不亂公自率精兵據大羊山阻其要道復請分兵五百抄伏敵後是夜賊冲殺數四公力

戰達曙身中數創士不傷者才五十人天明單騎哭之
大師繼進伏兵並起賊自相踐踏斬獲無算公逐之至
温州城下銃傷馬顛復奮起刃十餘人奪賊馬以戰貫
其眾由將軍橋以歸初貝子收兵失公所在大駭旣見
公喜且泣曰以一身當數萬眾戰終夜不殆神衛汝忠
耶是役也曾養性僅以身免耿氏精銳盡矣未幾還守
寧波中軍適賊船二百餘艘直臨定關公偵得定關守
備方俊受僞劄爲內應請提督立斬以示賊賊遽退守
象山公復請兵破之旋奉檄收捕大嵐山寇搜斬數百
人餘黨潰散時耿已輸誠而松陽遂昌山寇游魂出沒

貝子駐師石塘名公捕之賊首馮公輔屯鼓火山素誓
公威名出就撫其別魁林惟仁黃大相等擁眾黃鼻山
左倚懸厓右臨深潭以獨木爲橋山廣袤數十里莫可
蹤跡前督撫遣人招之輒爲所殺公令諸軍持三日糧
夜腰繩魚貫上席草而下至楊梅灘遇賊破之降其眾
山寇悉平而海寧復熾陷海澄困泉州斷洛陽長橋以
阻援兵公以副總兵官從康親王救勦自仙遊分兵兩
路由間道解泉圍奪江東橋守之破砦十有九遂復海
澄己未秋擢同安總兵官明年率舟師合大軍進攻金
厦賊棄兩島遁回臺灣會靖海侯施公烺來提督海疆

事議進攻澎湖引公自助遂以癸亥六月某日發銅山
取八罩直抵澎湖賊勢盛前軍被圍公單船拔出之翼
日進攻殺賊先鋒燒其船公所乘船忽爲潮水衝著石
上賊船火烈將及公副將詹六奇駕小舟挽公避再三
公以眾軍在船義不獨存堅却之船忽浮起士氣益厲
戰彌力賊大敗燬賊船百九十餘艘殲僞官將三百餘
員殺溺兵五萬計俘者皆縱遣使歸諭以恩信禍福整
眾臨之賊勢窮納款舉土降施侯凱旋留公鎮撫其地
自海逆負險造亂四世歷六十年所公與施侯合謀七
日而舉之

天子嘉公功眷待與施侯埒尋調鎮舟山海寇洪煥等二千餘人聞風歸命再擢四川提督破吳三桂餘黨楊善帥九經等散其眾川中海經兵燹千村荆杞伏莽竊發公嚴塘汛懸賞購募獲積盜三百餘人斃其魁六十三人於杖盜賊屏息鎮蜀十有一年施侯既卒

上念閩海反側非宿將莫能鎮壓遂調公福建陸路提督旋改水師凡十餘年前後如京師朝

行所者再

御書作萬人敵四字以賜加號威畧將軍優以世職請老不許今年夏

上於熱河行宮

御製七言律詩一章將以錫公命諸王以下大學士扈從諸臣皆屬和蓋追念元功所以褒崇之者甚備而公已於七月廿四終於位矣疏聞

天子軫悼下部議恤其孤應龍等將以某年月日葬公於某縣某地之兆狀公事績官階乞余銘其幽隧吾聞攻毒之餌恒出於瘴癘之區亂之興也其受亂之地必有人焉足以還自救也閩之亂亟矣莫甚於耿與鄭耿之平也公旣力諸原海氛之靖則施侯爲之主而公實贊之蓋公所至以功業自顯而造功於閩爲尤大余於公同

爲閩人又嫻好也知公深誌其可以辭乎公生前丁丑
十月初七得年七十有六配夫人蔡氏前公卒子男十
人應麟布政使司叅議江西督糧道亦前卒應龍刑部
郎中候補副使道應鳳壬午舉人戶部郎中應鵬福建
水師提標遊擊應鵬辛卯舉人應鶴歲貢生應樞應權
應機應璋俱幼應機余叔父永州總兵公埒也女五人
皆適名族孫男十二人女十三人曾孫五人公持身寬
厚謹恪官於家門不縱不苛鄉人久安焉待族嫺朋好
有恩禮雖勲高爵大異于古名將怙侈驕暴者故能以
功名終著行間紀遇一編所錄皆實余嘗序而行之茲

復誌公之槩而系以銘曰

雲雷之屯君子經綸天造草昧以啟厥勳敵

王所愾綏我鄉人保斯土者人亦保焉望公松楸孰敢不尊
千秋萬歲式固汝原

穆堂初稿卷之二十六

臨川李紱巨來

墓誌銘中

亡兄李巨中墓誌銘

嗚呼吾與兄別三四年所而忍遽誌其墓耶雖然不可以不誌也自吾考贈侍郎公新居臨川兄以長子承家政早貧廢學年五十四始補國子監生又三年而卒實雍正四年正月十九日也吾方總督直隸就官舍爲位遙哭而已嗚呼痛哉兄性和緩濡忍待親黨有恩歲辛丑所居鄉不雨富者遏糴穀直日騰兄盡出所積穀爲

米減直以應糴者所積垂罄而雨米價亦平里黨德之
子弟有違言或相詬誶兄痛自詆責俾知悔罪乃已信
家督也吾以懇急屢得旤方倚兄和緩爲師資而今已
矣長男在易爲震東坡易傳謂震而不和則必有僇仆
隕墜者若威而不猛則可以爲祭主兄非其人耶兄諱
績巨中其字嫂氏吳男二長孝江國學生次孝漢女一
孫男二友松友柏女二銘曰

和氣育物理所可必胡氣和而寢疾十年於茲數止於
五十七也謂天蓋高吾嗚呼致詰

亡弟李巨方墓誌銘

吾第四弟諱紳字巨方以雍正四年七月某日卒於家
遺言俟元長歸而葬我元長余長子孝源也孝源從余
於京師余以任督撫事被吏議賴

天子聖明遣之黔粵治土同事自贖孝源留京師視象累不
得歸旣余幸藏事以還吏議仍理前獄

天恩特原勘俾纂修八旂志書其明年孝源乃得歸江西襄
叔父葬事爲文志之曰先考

誥贈侍郎公生子六人次五早殤巨方與伯兄同一歲卒訃
聞相繼何其酷也巨方性伉直勇於爲義吾薄宦近二
十年迂拙饑困未嘗有升斗之祿逮親舊甲辰撫廣西

俸入餘銀一千兩始仰體

朝廷德意委巨方爲義倉以資里黨巨方犯暑治廩因走郡城和糴實之積勞致疾踰二年竟不起嗚呼痛哉巨方與伯兄並以佐家政不暇卒學業雍正元年始同補國子監生然素無宦情每聞余以沾激召讒必北向祝曰兄壹於剛久仕徒賈旣倘得脫塵網歸共啜薄廩無憾余誠未能遽歸孰謂弟亦不及待哉巨方娶黃氏晚始得子孝治側室許氏生二子孝澍孝泐女二人長字辛丑進士撫州府學教授鄧生牧子次字副總兵官仇君元正子銘曰

長就傅幼扶床諸子穉未勝喪兄弟之子猶子也式固
爾藏無鬱鬱於幽堂

文學劉先生墓誌銘

自象山陸子之教不明士墮於章句訓詁者三百餘年
洎王陽明先生倡明絕學然後士知有躬行實踐之功
當是時王門弟子江西爲最盛南昌梓溪鄉貢進士劉
公諱廷詔其一也公再傳至曾孫山陽訓導諱一琮並
以學行世其家訓導公生子諱昉負才早世遺孤諱丁
字先庚甫十二歲卽文學先生也先生自失怙恃嶄然
能自立誦鄉貢進士公遺書卽志爲實學慨然曰學非
文藝之謂亦非徒論說要使義理浸灌於心乃可貴耳
自是言動造次必於禮法每讀書正襟危坐至夜分未

嘗歆側待人必誠信弱冠補弟子員授徒自給來學者
必教以整齊嚴肅收斂精神曰此固聖學卽舉業無它
巧也鄉先達杜公果學行伏一世首命子來學於是成
就者甚眾每晨起奉先展拜始詣塾與生徒肅揖環座
講解各因其氣質提撕之咸惕然懼亦忻然各有得也
生平謙不逮養親尤嚴祀事祭器祭物省視必躬必信
質明行事悽愴怵惕觀禮者恒動容學無所不窺未嘗
敢自炫少時偶與同社鷄豚之會語及穡事有長者詰
子弟五穀獨以稷命官何也其子弟不能答先生亦止
作思索狀旣罷會或叩先生豈不能知蹙然曰白虎通

謂稷爲五穀之長不知古人意果緣此否且人不能荅
吾豈獨能耶其謹畏如此然與人爲善欸欸惻惻發於
至誠里黨有爲不義者遙望冠烏恒反走曰吾不敢見
劉先生往往徙其所爲涵養旣靜言事多預中金聲桓
之下江西也人方倚以靖亂先生獨憂之密語所親曰
忠信眾之師也恭敬位之表也誕則失民驕則無上斯
人久於此南昌其塗炭乎未幾果叛殘井邑

王師南征半歲而後定先生艱於嗣初娶張氏繼王氏又娶
張氏始生子某又久未有孫歲庚午年七十矣以易筮
之曰今歲必得好孫然吾不及見其成立當命名紹聞

僅可耳吾訓而已是冬果生孫踰二年而先生卒康熙
壬申七月十一日也紹聞以康熙五十二年舉於鄉榜
名吳龍以紹聞爲字雍正元年成進士改授翰林院庶
吉士今歷官刑科給事中能傳先生之學以清慎稱先
生著述甚富有經義二百篇詩古文八卷又歷代典畧
正學粹言等書凡數十卷其最精者在易獨不立語言
每謂三才萬物一理應感眼前日用莫非圖象不得以
傳註求也嗚呼若先生者可謂能世其家學無失陸子
陽明子之教者矣今科舉之士豈復有斯人乎宜其晚
始食餼僅以諸生終也初先生葬地未安紹聞將以今

壬子歲乞假歸葬於某山之原因來乞銘余方有志於先生之所學而媿躬行之不逮也敬爲銘曰

副墨匪子維誦匪孫學惟心得有之於其身佑啟後人其永瞻斯阡矣乎

蕭定侯墓誌銘

雍正二年某月日泰和縣學訓導蕭君定侯卒於官余方巡撫廣西其孤以行狀寄余乞文誌其墓余約其以湘颿堂未刻集見寄然後爲之湘颿堂集者吾臨川傅平叔先生占衡所爲詩古文辭而定侯實傳其學故欲觀其編校之得失以覘其所得之淺深而敘之也自明嘉靖以還古文中絕至

本朝之初耆儒宿學始復尋究韓李歐陽曾王諸公之遺法若侯朝宗王於一魏叔子汪茗文朱竹垞諸君子皆號爲海內健者而平叔先生獨爲第一平叔以其學授

館甥金谿黃若輟而定侯爲若輟女夫又受業傳其學
今雖未能大昌庶幾守而不失故余以是要之也聞其
孤已嘗鈔撮寄余家而余由廣西移節總督

幾輔旋內轉少司空未幾落職羈書局無由歸檢所寄發
之於文諸孤守其親遺命以未得余文淺厝不葬踰十
有二年其於禮可謂闕而於意則已勤矣今歲其次子
琰來應

京兆試親持狀以請余適由少司徒左遷需次閒居乃按
狀敘焉君諱復遠定侯其字也先世由吉水遷金谿居
十有四世祖諱淵父諱文忠以詩禮教子孫家法之善

爲鄉國冠君兄弟五人並以孝友文學稱而君尤有異稟年十五補弟子員十八受知督學何公拔第一食餼何公號知文而常熟名下士陶子師在幕中見君文驚爲逸才不知君固以古文爲時文也然十四試於鄉卒不及舉僅以歲貢生司訓泰和豈文章誠憎命達也耶余弱冠時偕君及同郡俊豪三十餘人爲文會其通籍者余與君而外僅馮翰林夔鵬禹拜吳舍人未權藍行人長青涂教諭雲來六七人仕旣不達又坎廩以死其猶存者余與未權長青三人其未仕而存者亦無幾蓋又不徒憎命達而已記憶始爲文會今垂四十年矣當

是時余與二馮輩意氣飛揚君獨恂恂退讓叩以湘颿
集必謙爲未學記稱學然後知不足教然後知困以君
之知不足知君之固嘗學之以君之知困知君之固嘗
與人共學之而乃不獲大顯以昌湘颿之學豈不惜哉
君生於康熙丁未歲某月日得年纔五十有八晚號耐
叟有耐叟文集八卷詩四卷藏於家子二人長琬琰
並諸生女四人並適士族孫男二人女三人銘曰
文章之蘊希不顯也胡天靳其施又自卷也其取效遲
庶收名遠也嗚呼君墓草宿矣而余未之展也其木拱
矣尙其勿翦也